

Augsburg, 1. Mai 1565

An Joachim Camerarius d. Ä.

BSB, Clm 10370, Nr. 293.

Clarissimo viro, D. Ioachimo Camerario etc. Domino et amico suo colendo. Leipzig.  
 S. Tot hoc anno abs te accepi literas, in quibus omnibus significas, te meas desiderare: vt nullas à me tibi redditas esse suspicer, et verear, ne frustra in posterum scribam omnes. Mercurium enim nunquam habui tam male propicium, iratum mihi fortasse propter Suidae μιξοβαρβάρου peruersiōnē, ad quas sordes fortasse dignatus est descendere. Sed idem si meminisset, se non modò λόγιον καὶ διάκτορα, ἀλλὰ καὶ σῶκον καὶ κερδῶν καὶ ἐριούνιον εἶναι, non succenseret clienti suo et cultori, qui propter nouae oeconomiae institutionem ex amēniori sacello transisset in obsoletius illud quidem, sed locupletius paulò atque benignius. Sed haec scribo, ne nihil scribam, etsi et quod scribam habeo, et id quidem quod te delectet. Oporinus noster locupletem Heruagij et iuuenculam viduam duxit τοῦ πάλαι οικοφθόρου κακοῦ, τὴν δειπνολόχην γυναῖκα λέγω, ἀπαλλαγείς. Id factum non Mercurio modò, sed virginibus etiam Musis probari confido, qui patronum habeant maiore beneficiandi facultate instructum. Nyssenum tuum propediem nos spero visuros. Vale. Augustae Vindelicorum Cal[endis] Maij 1565.

Hiero[nymus] Wolfius  
 πρὸ ὀλίγων ἡμερῶν  
 πήραν τὲ κενήν  
 χρημάτων καὶ δέρμα  
 ψωριῶν ἐκ τῶν  
 θηριωδῶν λουτρῶν  
 ἀνακομισάμενος.

Cos. noster et ὁ ἀλαρεῖχος plurimum te saluere iubent.